

PIVS PP. XII

Ad perpetuam rei memoriam

Providentissimi Dei est, prout ipsa humana docet ratio et sacris confirmatur Chartis, mundum legibus regere et justitiam ita inter homines inferre, ut boni malis arceantur, mali vero, custoditi atque observati, sollicitati, numquam tamen libertate sua destituti, boni fiant, utque contingat "omnes homines salvos fieri", sic revelante Deo. De quo perenni malum inter et bonum dirimendo certamine Omnipotens Deus Sancto Michaeli Archangelo mandavit, cujus nomen "quis ut Deus" sonat ac "fortitudinem Dei" exprimit et denotat. Ipsi enim, qui Angelicae militiae Dux ac Princeps est a Deo constitutus, tenebrarum Principi ejusque satellitibus resistere commissum fuit, tum eundem aeternum Dei inimicum e caelesti Paradiso expellendo et in profundum conjiciendo Infernum, tum Mulierem illam, quae "amicta sole, et luna sub pedibus ejus, et in capite ejus corona Stellarum duodecim" in Apocalypsi apparet, non sine immani pugna defendendo, tum denique "animas suscipiendas" in Caelum strenue fortiterque servando, ad majorem Dei gloriam. Haud aliter, ut bona et ordinata dici possit atque caelesti Regno similis, accidit in terrestri hac Civitate, in hominum scilicet societate, quae, ad justitiam fovendam tuendosque bonos, robore ac fortitudine indiget legumque praesidiis fulcitur. Nil mirum proinde quod publicae disciplinae in Italia Praepositi, grave impensumque pro communi bono civiumque utilitate militum onus attente considerantes atque de eorum physica et spirituali tutela quam maxime solliciti, Sanctum Michaelem Archangelum publicae securitatis gerendae apud Deum Patronum jugiter habuerint. Solent enim christiani Exercitus, ex vetusta ac laudabili consuetudine, Summis Pontificibus faventibus et confirmantibus, caelestes Patronos, qui in adversis rebus, immo et in periculis, omnes et singulos tueantur illisque exoptatam tribuant victoriam, sibi deligere atque adscribere. Quos inter nullus publicae securitati servandae aptior et magis consentaneus apparuit, quam caelestis ille Angelicae Cohortis Princeps, Michael nempè Archangelus, divina contra "tenebrarum potestates" cum sit fortitudine praeditus. Quae cum ita sint, Venerabilis Frater Carolus Albertus Ferreo di. Cavallerleone, Archiepiscopus titularis Trapezuntinus, Ordinarius Militaris pro Italia, supra memorata vota excipiens, quo magis publicae disciplinae ac securitatis tutorum, sive Optimatum sive militum, spirituali bono ipsorumque contra civilium legum detractores praesidio consulatur, enixas Nobis preces adhibuit ut Sanctum Michaelem Archangelum totius publicae securitatis tuendae Administrationis caelestem Patronum benigne declarare dignaremur. Nos porro, Romanorum Pontificum Decessorum Nostrorum vestigia prementes, ad augendam illorum, quos supra memoravimus, pietatem, ipsosque superno munimine et auxilio roborandos ac defendendos, hujusmodi votis precibusque annuendum perlibenti censuimus animo. Qua propter, audito Venerabili Fratrem Nostro Clemente Sanctae Romanae Ecclesiae Cardinali Micaela, Episcopo Veliterno, Sacrae Rituum Congregationis Praefecto, certa scientia ac matura deliberatione Nostra deque Apostolicae Nostrae potestatis plenitudine, praesentium Litterarum vi perpetuumque in modum

Sanctum Michaelem Archangelum praecipuum totius Italicae publicae disciplinae ac securitatis tuendae Administrationis apud Deum Patronum declaramus, facimus ac constituimus, omnibus et singulis liturgicis privilegiis atque honoribus adjectis, quae praecipuis Coetuum Patronis caelestibus rite competunt. Contrariis quibuslibet minime obstantibus. Haec edicimus, statuimus, decernentes praesentes Litteras firmas, validas atque efficaces jugiter existere ac permanere; suosque plenos atque integros effectus sortiri et obtinere; illisque ad quos spectant, seu spectare poterunt, nunc et in posterum, plenissime suffragari; sicque rite judicandum esse ac definiendum; irritumque ex nunc et inane fieri si quidquam secus, super his, a quovis, auctoritate qualibet, scienter sive ignoranter attentari contigerit. Datum ex Arce Gandulphi, sub anno Piscatoris, die XXIX mensis Septembris, in festo Sancti Michaelis Archangeli, anno MCMLXIX, Pontificatus Nostri undecimo.

De speciali mandato Sanctissimi
Pro Domino Cardinali a publicis Ecclesiae negotiis



Gildo Brugola
Officium Regens
Pontificis Diplomatici, ex officio.